

Pidipenteidi inänite Pabodo nänö cadota ante yewæmongainta

Waa quëwëedäni, ante

¹ Itota Codito ingante në cæmöna inte botö tönö Timoteo guëa apænemöna ininque botö Pabodobo adoboque yewæmömopa. Minitö Pidipoto inömö quëwëninque Wængongui quimäni inömäni inte Itota Codito nempo në quëwëminä inöminite botö, Acæminimpa, ante yewæmömopa. Mäni pönencabo beyænque ante pancamäniya në aamäni inöminite pancamäniya guiquënë në cämäni inöminite pancamäniya guiquënë önöminique inöminite botö edæ, Tömämäni edæ acæminimpa, ante yewæmömopa. ² Mönö Mæmpo Wængongui mönö Awënë Itota Codito tönö waadete pönö cæda ate gänë pönëninque waa quëwëedäni, ämopa.

Në pönemäni beyæ Wængongui ingante apænebopa, ante

³ Æyedemë minitö iminite ante pönemo inte botö Wængongui ingante waa ate pönëninque apænebopa. ⁴ Ininque minitö beyæ ante Wængongui ingante wantæ inö wantæ inö apænedinque botö, Waa quëwëminä, ante watapæ todinque apænebopa. ⁵ Edæ, Botö täno goyedë minitö godongämæ cämäniäpa. Ayæ, Mönö Codito ingantedö ante minitö nöwo ganca godömenque watapæ apænemäniä, ante pönëninque botö, Wængongui bitö pönö cæbi ate pidipenteidi waa cädänä, ante apænebopa. ⁶ Minitö botö ayömo täiyæ wæmö entawencæminimpa, ante në mä badongängä inongä inte Wængongui nöwo Itota Codito nänö ponguinganca

godömenque pönö badöningue cöwë iinque badongä ate mīnitö ædæmō pæimīni bacæminimpa. Mänömaï impa, ante botö, Näwangä impa, ante do ëñëmopa.

⁷ Mönö Codito ingantedö ante watapæ möni ëñëñinö ante botö wææ äningue, Näwangä impa, ante apænebopa. Mänine botö apæneede beyænque pancayedëña botö imote tee mönedäni wæbopa. Incæte tee mönedäni wæbo incæ, Näwangä impa, ante wææ ämo incæ Wængonguï nänö waadete pönö cægäinö ante ænte entawëñömo mīnitö adobaï mäninö ante æningue botö tönö godongämæ entawëminipa. İningue, Mönö mäninö ante äanque baï entawëmö imompa, ante mīnitö imīnite waadete pönëningue botö, Mīnitö ædæmō pæimīni bacæminimpa, ante nöingä cæte pönëmopa. ⁸ Itota Codito mönö imonte nanguï waadete pönengantawo. Edæ tömengä waadete nänö pönënö ante entawëningue botö mīnitö imīnite waadete pönëmopa, ante adinque Wængonguï incæ, Pabodo näwangä mīnitö imīnite nanguï waadete pönengampa, ante apænebaingampa.

⁹ İningue mīnitö beyæ ante botö Wængonguï ingante iïmaï ante apænebopa. Mini waadete pönencabo iñöminite Wængonguï pönö cæcä ate godömenque waadete pönencæminimpa. Ayæ waadete pönëmīni inte mīnitö, Quinö wënæ wënæ i, Quinö waa i, ante edonque adinque nö apænte ämīni bacæminimpa. ¹⁰ Mönö æbänö cæte waa quëwenguï, ante edonque adinque mīnitö Ao ante waa quëwëningue Itota Codito nänö ponguinganca wentamö mongänämaï inte tee tëwadämaï imīni incæminimpa. ¹¹ Ayæ Itota Codito pönö cæcä ate mīnitö nö cædinque waa quëwëminī adinque wadäni Wængonguï ingante waa ate pönëningue apænecädänimpa, ante botö Wængonguï ingante apænebopa. Ayæ mīnitö mänömaï inte waa cæmīni adinque tömänäni wæætë Wængonguï

ingante apænedinque, Wængongui ěñěmi. Bitö ñäö bai ěmönömi inte waa pöni cæbipa, ante apænecædänimpa, ante cædinque botö mīnitö beyæ ante Wængongui ingante apænebopa.

Pabodo, Codito beyænque quěwěmopa, angampa

¹² Īñänäni apænebo ěñěedäni. Mänömaï cædäni botö wädö incæ wī ōnonque cætimpā. Wæætě, Codito beyænque Pabodo caate wæcampa, ante adinque wadäni godömenque nanguï inäni Codito ingantedö ante watapæ möni apænedö ěñěninque wede pöněnāni badänipa.

¹³ Edæ, Codito ěmöwo apænecä beyænque Pabodo ingante tee mönedänipa, ante tededäni ěñěninque odömāno tæiyæ awěně oncö wææ wänönāni incæ wadäni wayömö quěwěnāni incæ tömänāni do ěñěnānipa. ¹⁴ Mönö Awěně nempo quěwěnāni incæ, Pabodo tee mönete wæcampa, ante wædinque wodo tömänāni godömenque wede pönente badänipa. Īninque wede pöněninque tæï pīñænte entawěninque töměnāni guiñěnāmaï inte Wængongui nänö apænedö ante godömenque apænedänipa.

¹⁵ Pancadäniya, Pabodo mīñæ godömenque nanguï inäni godänipa, ante pönö piinte adinque Codito ěmöwo ante apænedäni incæte botö ĩmote guěadö guěa pīincæte ante apænedänipa. Mänömaï ĩ incæte wadäni guiquěně, Pabodo tönö mönö godongämæ cæcæimpā, ante gäně pöněninque Codito ěmöwo ante apænedänipa. ¹⁶ Ně gäně pönente apænedäni guiquěně, Codito ingantedö ante watapæ mīni ěñěněnö ante Pabodo wææ ancæcæimpā, ante botö ĩmote godö gö cæcampa, ante do ěñěnānipa. Īninque töměnāni botö ĩmote waadete pöněninque apænedänipa. ¹⁷ Ně wæætedö wæætě tededäni guiquěně, Pabodo tee mönete wæyongante mönö apænete tomö wæcä tocæï, ante cædänipa. Töměnāni

nämä beyænque ante cædāni incæte waa cæte bai cæd-
 inque Codito ëmowo ante apænedānipa. ¹⁸ Incæte
 pancadāniya nämä beyænque ante apænedāni incæ
 pancadāniya nō pönente apænedāni incæ mänināni
 tömänāni Codito nānō cægainō ante nāwangä ante do
 edæ apænedānipa. Mänömaï impa, ante pönëninque botö
 watapæ tobopa.

Ayæ iïmaï ante pönëninque cöwë godömenque nanguï
 tocæboimpa. ¹⁹ Minitö Wængonguï ingante botö beyæ
 nanguï apænemini ëñëninque Itota Codito Önöwoca pönö
 cæcæcäimpa, ante ëñente tobopa. Ìninque ñöwo botö
 caate wædö ante edæ iïncayæ ate ñimpo cædāni ate edæ
 botö abæ tawænte gote quëwenguinque edæ impa, ante
 do ëñëninque tobopa. ²⁰ Botö wëenëñedë botö cæbo
 bai ñöwo adobai cæinëmo imopa. Ìintai ëñate miïmö
 quëwëmo incæ baonque wænönāni wæmo incæ, Mönö
 Codito ingante waa acædānimpa, ante cædinque botö
 cöwë guïñënāmaï inte tæï ongöninque nanguï cædinque
 watapæ edæ bacæboimpa, ante pönëmopa. ²¹ Edæ ingui-
 poga quëwëmo incæ botö Codito ingante entawëninque
 tömengä beyænque ante quëwëmopa. Wæætë wæmo
 incæ tömengä beyæ botö godömenque nanguï entawen-
 guïmo imopa.

²² Incæte, Waiwæ nanguï incate bai botö cæquinque
 inguipoga ayæ quëwenguënëmo imopa, ante pönëninque
 botö, Æbänö anguïmoo, ante ëñencæte ante wæbopa.
 Edæ, Wæncæboimpa, ante anguënëmo imoo. Wæætë,
 Ayæ quëwencæboimpa, ante anguënëmo imoo. Edæ,
 Æbänö anguënëmo imoo, ante botö edæ ëñënāmaï imopa.
²³ Edæ wada bæi ongonte æmatæ töö æmatæ töö godöna
 wæcä bai wædömo inte botö, Ædönö gämænö goqui-
 moo, ante wæbopa. Codito weca godömenque waëmö
 pöni quëwencæboimpa, ante botö wadæ goinëmo imopa.

²⁴ Incæte inguipoga quëwëningue mīnitō beyænque ante cæquënemo inte botō ædō cæte wayōmō goquimoo. ²⁵ Ante pönente wædinqe botō, Mīnitō mōnō pönënō ante godōmenque wede pönëningue watapæ tote quëwencæmīnīmpa, ante cæquīmo īmopa, ante ëñëmopa. Ayæ, Ñōwo wænāmaī inte botō mīnitō weca quëwenguīmo īmopa, ante do ëñëmopa. ²⁶ Īningue botō mīimo inte mīnitō weca pōmo adinqe mīnitō Itota Codito ingante waa adinqe botō beyænque nanguī tocæmīnīmpa.

²⁷ Codito ingantedō ante watapæ mōnō ëñëninō beyæ ante mōnō waa cæquënëmō īmopa, ante ëñëmīni inte mīnitō edæ waa cæte quëwëedāni. Mānōmaī cæmīni ĩningue botō önōmoncaque ëñëmo incæ mīnitō weca ponte abo incæ, Pidipenteidi adoyōmō pönëningue tæi ongönānīpa, ante tededāni ëñëningue tobaīmopa. Ayæ, Codito ingantedō ante watapæ mōnō ëñëninō ante wadāni ëñencædānīmpa, ante pidipenteidi īñacabo cædinqe nanguī cædānīpa, ante botō edæ ëñente tobaīmopa. ²⁸ Ayæ pīinte cædāni incæte mīnitō wæætë guīñënāmaī inte tæi ongōmīnīpa, ante adinqe botō tobaīmopa. Mīnitō mānōmaī guīñënāmaī inte tæi ongōmīni ate wædinqe nē pīinte ānāni wæætë, Mōnitō wænguingue impa, ante wæcædānīmpa. Nē pönëmīni mīni quëwenguīnque impa, ante adinqe tōmënāni godōmenque wæcædānīmpa. Edæ Wængonguī ængā beyænque quëwencæmīnīmpa.

²⁹ Wængonguī waadete pönō cæcā ate mīnitō Codito ingante wede pönëmīnitawo. Edæ adocā pönō cæcā ate mīnitō Codito beyænque cædinqe cōwë caate wæquīmīni īmīnīpa. ³⁰ Pabodobo doyedë Codito beyæ ante wææ ancæte ante caate wætabopa, ante amīnitawo. Ñōwo godōmenque wææ cædinqe caate wæbopa, ante önōmoncaque ëñëmīnitawo. Īningue botō wææ āninqe

caate wæbo bai mīnitō adobai botō tōnō godongāmæ
wææ ānīnque caate wæmīni imīnīpa.

2

Codito önonganque bayongante Wængonguī da æænongä

¹ Mönö Codito nempo quëwëninque mīnitō wampo pönëmīnitawo. Tömengä waadete pönengä beyænque ganca pönëmīnitawo. Mönö Codito Önöwoca tōnō ääwocaque bai ëwocadinque godongāmæ watapæ quëwëmīnitawo. Në wæcä ingante godō waadete pönëmīnitawo. Adocanque wæwengä adīnque mīnitō āanque bai wæwëninque tömengä beyæ cæmīnitawo.

² Mänömaī ī inīnque adodonque pönëninque mīnitō waa waademīni adīnque botō watapæ pōnī tobaīmopa. Tömämīni āanque bai ëwocadinque, Mönö adoyömö cæcæimpa, ante godongāmæ cæmīni adīnque botō godömenque nanguī watapæ tobaīmopa. ³ Inīnque mīnitō nāmanque ante pönëninque, Botō imote waa acädänimpa, ante cädämaī iedäni. Yæcado ongoncæboimpa, ante cädämaī iedäni. Wæætë, Botō önömoque bai iñömote wadäni wæætë waa pōnī inānīpa, ante pönëninque wadänīque inānite ængö cæedäni. ⁴ Nämä mīni cæinënö ante cædinque mīnitō wīi mänīnonque ante cædinque wæætë edæ wadäni nāni cæinënö adobai ante cæedäni.

⁵ Mänömaī cædinque mīnitō Itota Codito nänö pōnen-gainö bai adodö ante pōneedäni.

⁶ Tömengä iñömö cöwë näwä Wængonguī inongä ingampa. Incæte, Botō näwä Wængonguīmo ingaimo inte

Mæmpo Wængonguī ganca botō ingainö ante ñimpo cädämaī incæboimpa, ante tömengä änämaī in-gacäimpa.

⁷ Wæætē edæ, Mäninö botö ingainö incæ botö edæ ñimpo
cæcæboimpa, äninque wææ,
önonganque bai bagacäimpa.

Ayæ, Wængongui ingante nē cædömo edæ bacæboimpa,
ante badinque wææ,
tömengä waomö mönō emönō bai nänō emonguinque
waocä eñagacäimpa.

⁸ Mänömai eñate pæte wææ tömengä önonganque inte
bai cæyongä Wæmpocä,
Bitö wænguino taadö gocæbiimpa, angä eñëninque edæ
Ao ante goyongante wææ,
tömengä nänō guiñëñaquinque awæ ñænquedimæ cæte
mäo timpodäni wææ tiwadäni ate tömengä caete
wægöninque wææ bacaa edæ wængacäimpa.

⁹ Mänömai cæcä adinque Wængongui wæætē tömengä
ingante æmonga pönī da æænongacäimpa.
Ayæ wadäni emöwo önöwoque emönäni bai tömengä
Tæiyæ Awënë inongä inte wii adobai önöwoque
bai emoncæcäimpa, ante cædinque Wængongui
edæ, Itota Codito ingampa, ante pönö pemongacäimpa.

¹⁰ Edæ öönädē quëwënäni incæ inguipoga quëwënäni
incæ guimonga quëwënäni incæ
tömänäni edæ Itota emöwo eñente waa adinque
da guicapocädänimpa, ante Wængongui tömengä in-
gante pönö pemongacäimpa.

¹¹ Ayæ, Itota Codito ingante adinque tömänäni,
Mönö Tæiyæ Awënë inongä ingampa, ante edæ Ao an-
cädänimpa, ante Wæmpocä cægacäimpa.
Mänömai cæcä adinque, Mæmpo Wængongui waa pönī
cæcampa, ante mönō edæ watapæ apænecäimpa.

Nëmoncoo äo äo cædote bai nöinö cæte quëwëedäni

¹² Mänömaï beyæ botö nê waademini iñöminite botö apænebo ëñeedäni. Minitö weca botö quëwëñedë minitö do ëñente cædimini inte ñöwo botö wayömö quëwëmo incæ godömenque ëñente cæmini abopa. Ìninqe cöwë mini ëñente cædinö bai adobaï cædinque ñöwo mönö watapæ quëwenguinö taadonque gocæte ante cædinque, Oda cæte wæcæ wæ, ante cöwä aquënë quëwëminii. ¹³ Wïi cæinente awædö, ante wæminitawo. Edæ Wængonguinque apænecä ëñente entawëninque minitö tömengä waa pöni nänö änö ante nê ëñente cæinëmini baminipa. Oda cæte awædö, ante wæminitawo. Adocä Wængonguinque mongæncadæ mongæncadæ cæcä ate tæï piñämïni bate ate eyepæ cæminipa.

¹⁴ Ìninqe, Wïi cæinente awædö, ante änämaï inte minitö piyænë cæte mini cæquënënö ante do cæedäni. ¹⁵ Edæ mänömaï cæmini adinque wadäni, Wentamö mongænämaï iminipa, ante abainänipa. Ayæ ingui-pogaque quëwënäni ëñenämaï inte idiquibæ pörente cæyönäni minitö wæætë Wængongui wëñämïni inömini inte tömënäni weca quëwëninque nëmoncoo äo äo cædote bai nöingä cæte quëwencæminimpa. ¹⁶ Edæ, Codito pönö cæcä beyænque mönö quëwengäimpa, ante edonque apænemini ëñencædänimpa. Ìninqe, Doyedë botö apænedö ante minitö nê ëñente cæminipa, ante adinque botö nanguï todinque iïmaï ante pönëmopa. Minitö beyæ pæ pagænte cædömo incæte botö wïi önonque cæboimpa. Wæætë mönö Codito nänö ponguïönæ iñonte botö, Minitö nö apæneminitapa, ante adinque botö tocæboimpa. ¹⁷ Ayæ, Wængongui qui, ante baö godöninque waodäni baonga tepæ gao caadänipa. Minitö iñömö wede pönëmini inte, Wængongui qui, ante nämä godö cæyömini botö quëwenguimämo incæ mini godönincooga gao caate bai ba edæ waa tobaimopa. Minitö

tönö godongämæ edæ tobaimpa. ¹⁸ Minitö adobaï, Pabodo mönö beyæ cæcampa, ante tocæminimpa. Edæ mönö edæ godongämæ tocæimpa.

Tímoteo tönö Epapododito

¹⁹ Minitö æbänö quëwëminii, ante ëñëninque Tímoteo wæætë apænecä ëñente tocæboimpa, ante cæd-
inque botö, Itota Codito Ao angä ate Tímoteo ingante
oo da pönömo minitö weca poncæcäimpa, ante pönë-
mopa. ²⁰ Minitö æbänö quëwëminii, ante wæyömo
tömengä adocanque minitö beyæ ante botö tönö guëa
wæcampa. Wadäni guiquënë minitö beyæ ante wädämaï
inänipa. ²¹ Tömänäni edæ nämä beyænque ante cæinente
wædinque Itota Codito nänö änönö ante wii cæinänäni
inänipa. ²² Cöwä ayömini, Tímoteo iñömö cöwë waa cæ-
campa, ante do ëñëminitapa. Ayæ mönö Codito ingantedö
ante watapæ apænedinque Tímoteo tönö möna wencaya
baï guëa cæmönapa, ante do ëñëminitapa. ²³ Ìninque,
Botö ìmote awënëidi æbänö apænte anguinänii, ante
ëñente ate botö Tímoteo ingante mänïñedë ate minitö
weca do da pönömo poncæcäimpa, ante pönëmopa.
²⁴ Ayæ mönö Tæiyæ Awënë Ao angä ate tömëmo do
pömaïmopa.

²⁵ Ayæ Epapododito mönö tönïñacä incæ botö tönö
guëa cæmöna ìmönapa. Wadäni piinte cædäni ad-
inque mönatö guëa wææ cæmönapa. Tömengä ingante
minitö, Pabodo beyæ ante godö cæcæbiimpa, ante do
da pönömini ponte cæcä æntabopa. Tömengä ingante
ñowo wæætë adodö minitö weca edæ da pönömo ponguë-
nengä ingampa, ante pönëmopa. ²⁶ Adocä Epapododito
iñömö minitö pidipenteidi ìminite acæte ante edæ nanguï
wæcampa. Ayæ, Epapododito daicawo gawængampa,
ante apænedäni ëñëninque pidipenteidi do wädänipa,
ante ëñente wædinque tömengä wæætë minitö beyæ

ante nangui wæwente bacampa. ²⁷ Nāwangä impa edæ. Tömengä daicawo gawænte wodo wængantapa. Incæte Wængongui tömengä ingante waadete pönö gampocä waa bacantapa. Mänömaï cædinque Wængongui botö beyæ adobaï ante pönëninque, Pabodo wii godömenque wæcæäimpa, ante pönengä inte edæ Epapododito ingante gampocä waa bacantapa.

²⁸ Mänömaï beyæ, Epapododito wæætë pongä adinque tocæminimpa, ante cædinque ayæ, Minitö tomïni adinque botö wæwënämaï bacæboimpa, ante cædinque botö tömengä ingante ñöwo da godoncæboimpa, ämopa. ²⁹ Pongä ate minitö, Mönö Awënë nempo quëwënömi inte pöe, äninque Epapododito ingante waa adinque godongämæ watapæ tote cædäni. Ayæ wadäni tömengä baï adobaï waa cædänipa, ante adinque tömënäni inänite waa adinque waa cædäni. ³⁰ Minitö, Pabodo beyæ ædö cæte cæquimöni, ante, Gobæ awædö, ante wæyöminite Epapododito iñömö edæ, Wämo incæ cöwë cæcæboimpa, ante minitö cæquënönö ante cæcantapa. Codito beyæ ante cæcæte ante edæ tömengä wodo wængantapa cæminii. Tömengä ingante edæ waa cædäni, ämopa.

3

Tæi piñænte cæcæimpa, ante

¹ Ñöwo iñömö botö töninamini ëñeedäni. Mönö Awënë nempo quëwëninque miini watapæ toquinque iminipa. Minitö oda cædämaï incæminimpa, ante botö adodö adodö ante ancaa yewæmomo incæte wædämaï imopa.

² Iïmaï ämopa. Wadäni iñömö, Mönö ëö togænte quëwengäimpa, ante në änewënäni inte guintaidi baï wënæ wënæ cædinque nämä baö ëö ëö towënänipa. Ante adinque minitö tömënäni inänite gomö adinque

wææ cæedāni. ³ Edæ tōmēnāni inānite ee adinque Wængonguī mōnō imonte wæætē pōnō ēō togænte bai cædinque mōnō wentamō mongænō do wido cægacāimpa. Wængonguī Ōnōwoca ingante ænte ēwocamō inōmō inte mōnonque edæ, Wængonguī ingampa, ante tōmengā beyæ cæmompā. Itota Codito nempo quēwēmō inte mōnonque wīi inguipoga beyænque quēwēmō imompā, ante mōnō tōmengā ingante waa ate apænemompā. ⁴ Tōmēnāni guiquēnē inguipogaque ante pōnēninque, Mōnitō cædō beyænque quēwencæmōnimpā, ante pōnēwēnānipā. Tōmēnāni nāni pōnēwēnō bai adobai pōnente bai botō, Tōmēnāni wædænque cæyōnāni botō godōmenque nangui cædōmo imopā, ante pōnēwencædōmoimpā. Edæ, Nanguī botō cædō beyænque quēwencæboimpā, ante pōnēwencædōmoimpā.

⁵ Edæ tōmēnāni nē ēō togæināni inānitawo. Botō inōmō adobai imopā. Tæcæ ēñayōmote ōnompō æmæmpoque go mēōnaa go adoōnæque mānimpoōnæ inōnte botō imote do ēō togænāni wægaboimpā. Tōmēnāni idægoidi inānitawo. Botō inōmō idægo wodi pæimo inōmo inte tōmengā nānōmocā Beencamīnō wodi pæimo inōmo imopā. Tōmēnāni ebedeoidi inānitawo. Botō inōmō ebedeobo ēñagaimo inte nāwā ebedeobo inōmo imopā. Tōmēnāni Paditeoidi inānitawogaa. Edæ botō Paditeobo inōmo inte Mōitee wodi nānō wææ angainō ante mōni Paditeocabo wædō ante tōmāā ēñente cædōmo imoi aedāni. ⁶ Ayæ tōmēnāni, Wængonguī beyæ nangui cæcæimpā, ante apænedānitawo. Edæ, Wængonguī beyæ cæbote, ante edæ botō inōmō doyedē Codito ingante nāni pōnengaincabo inānite anca togænte pancæte ante cægaboī aedāni. Ayæ oodeoidi guiquēnē, Mōnitō wææ angainō ante nē ēñente cædānique nē nō cædāni inānipā,

ante änänitawo. Botö iñömö edæ mäninonque ante cöwë cædömo inte wentamö mongænämaï inömo imopa.

⁷ Doyedë iñömö botö mänömaï godömenque waa cædimo inte, Botö toquinque waa pönï cægaboimpa, ante pönëwentabopa. Nöwo guiquënë botö waa cægainö ante, Önonquedö ante cægaboï, ante do ëñëmopa.

⁸ Ayæ wææ, Itota Codito botö Awënë ingante adimo inte botö tömengä ingante pönëninque tömengä tönö godömenque waa pönï quëwencæboimpa, ante botö, Wëenëñedë botö entawengaincoo botö waa againcoo incæ edæ ëwenguincooque impa, ante pönëmopa. Edæ Codito beyæ ante cæyömo botö wëenë mänincoo tömancoo edæ dæ ba wætabopa. Ininque, Codito ingante godömenque ëwocacæboimpa, ante nanguï cædinque botö, Wëenë botö entawengainö ompotacoo bai impa, ante wido cæbopa.

⁹ Edæ, Iïmaï cæedäni, ante nani wææ angainö ante ëñente cæbo incæte Wængonguï ayongante botö ædö cæte mäninö beyænque nö entawëmo baquïmoo. Wæætë Codito mönö në nö cædongä ingante wede pönëmo inte tömengä nempo quëwëñömote Wængonguï pönö badongä ate nö cæbo bacæboimpa, ante nanguï cæbopa.

¹⁰ Mönö Codito ingante ate bai pönencæboimpa, ante cæbopa. Ayæ tömengä adocä nanguï tæï piñæninque ñäni ömæmongacäimpa, ante wede pönëninque botö mäninö tömengä në ñäni ömæmongaingä nänö tæï piñænö bai adobai entawencæboimpa, ante cæbopa. Ayæ adobai, Tömengä caate nänö wængai bai botö tömengä beyæ wæncæboimpa, ante pönëninque botö tömengä tönö godongämæ caate wænte bai tömengä nänö ëwocadö bai ëwocacæboimpa, ante cæbopa. ¹¹ Mänömaï cædinque botö, Tömengä wænte ate ñäni ömæmonte nänö quëwengai bai botö adobai wænte ate ñäni ömæmoncæboimpa,

ante nanguï cæbopa.

Mänömaï bacæboimpa, ante nanguï cæbopa, ante

¹² Mänömaïnö ante apænedinque botö, Codito nänö entawënö bai do entawëmopa, ante dicæ apænebogaa. Picænäni bai do badinque nö cædinque oda cædämaï imopa, ante dicæ apænebogaa. Incæte Itota Codito incæ edæ, Botö ewocadö bai adobai ewocacæbiimpa, ante botö imote do bæi ongongacäimpa. Ininque botö wæætë, Tömengä waa pönï nänö ewocadö bai adobai ewocacæboimpa, ante bæi ongoncæte ante nanguï cæbopa. ¹³ Iñänäni ëñeedäni. Botö Codito nänö ewocadö ante dicæ eyepæ æmogaa, ante wæbopa. Incæte, Eyepæ ænämaï imopa, ante adinque wæwënämaï imopa. Wæætë, Incayæ ate Codito nänö ewocadö bai ædæmö ewocacæboimpa, ante cædinque botö mäninonque ante pönëninque pogodo gote bai cöwë cæbopa. ¹⁴ Wængonguï do, Bitö Itota Codito nempo quëwënömi inte eyepæ cædinque æmonga ponte æe, ante botö imote aa pegacäimpa. Ininque tömengä, Pædæ pönömo æncæbiimpa, ante nänö angaincoo ante ænte ewocacæte ante botö gänä cæcæte ante pogodo gote bai edæ nanguï cæbopa.

¹⁵ Mönö æmäwo picæmö badömö iñömö tömämö adobainö ante pönenguënëmö imopa. Pancaminiya guiquënë mänömaïnö ante wii pönëmini adinque Wængonguï, Minitö æbänö nö pönenguënëmini imïni, ante pönö odömongä ate ëñencæminimpa. ¹⁶ Mönö do ëñente quëwenganca mäninganca mönö cöwë nö cæte quëwengäimpa.

¹⁷ Iñänäni ëñeedäni. Botö Pabodobo æbänö cæboo, ante adinque mïnitö botö cædö bai adobai godongämæ cæedäni. Ayæ, Mönitö cæmöni bai mïnitö adobai cæedäni, ante odömömöni bai pancadäniya adobai cædäni adinque mïnitö iñömö, Adobai cæcäimpa,

ante tömënäni inänite cöwä aedäni. ¹⁸ Minitö iminite wantæ wantæ iñö wantæ wantæ iñö apænedimo inte botö ñöwo Ca ca wædinque adodö ante iïmaï ante godömenque apænebopa. Mönö Codito awäa wängä incæte nanguï inäni tömengä ingante Baa äninque tömengä nänö wängaiwæ ante piïnte bai cædänipa, ante awædö. ¹⁹ Tömënäni nani ömæe ewente wæquinque mänömaï cædänipa. Cænguï beyænque ante pönente quëwënanipa. Wënæ wënæ nani cædö beyæ guingo imonte wæquënënäni incæ tömënäni wæætë guiññadämaï inte edæ, Waa pönï cæmönipa, ante nämä incæ waa adänipa. Edæ inguiþoga beyænque ante cæinente wædänipa.

²⁰ Mönö iñömö memþoga ëñagaïmö inte mönö öönædë ömæ do ëamö edæ imompa. Æninque mönö Awënë Itota Codito, Quëwencæminipa, ante në Ængaingä ingante nanguï ainente wædinque mönö, Tömengä æyedënö öönædë edæ wææ þongungää, ante wänö cömompa. ²¹ Tömengä iñömö tæï piñænongä inte tömancoo edæ bæ tadinque ö æninque Tæiyæ Awënë incæcäimpa. Æninque, Mönö quëwenguinämaï aquiiñö ëñamompa, ante adinque tömengä tæï piñænongä inte, Botö baö bai tæiñö mongæncæminipa, ante badongä ëñaquimö imompa.

4

Mönö Awënë nempo quëwëninque watapæ tocæimpa

¹ Wængonguï botö imote þoganta pönö wencate bai cædinque, Bitö waa apænebi ëñente beyænque pidipenteidi ëñente waa cædäni abopa, angä ëñëninque botö minitö beyæ ante watapæ tobopa. Minitö iminite ædæmö waadedinque botö, Æyedënö bee tenguïmoo, ante wæbopa. Æninque botö në waademini ämo ëñeedäni.

Mäninö botö äninö eñente cædinque mīnitö mönö Awënë nempo quëwëninque täi ongödäni.

² Nöwo Eodia, Tintique, mīna onquiyæncaya iminate ämo eñeeda. Mönö Awënë nempo quëwëninque minatö piyänë cæte adodunque ante cæbæweda, ämopa. ³ Botö mönö Awënë ingantedö ante watapæ apænecæte ante nangui cæyömote Codëmente tönö wadäni botö tönö iñacabo cædänitapa. Wængongui, Nāni quëwenguinta, ante tömengä nānö yewæmongaintaa tömënäni ëmowo dobæ yewæmonte mä öñompa. Tömënäni botö tönö cæyönäni iina onquiyæna Eodia tönö Tintique iñömö botö tönö adobai iñacabo nangui cæda inatapa. Inique bitö cöwë botö tönö guëa cædömi iñömite bitö imite ämopa. Iina inate bitö waadete apænebi eñëninque piyänë cæte quëwencædaimpa.

⁴ Ayæ tömämīni imīnite, Mönö Awënë nempo quëwëninque watapæ tote quëwëedäni, ämopa. Edæ, Watapæ pönī tote quëwëedäni, ante adodö ante ämo eñëedäni. ⁵ Mönö Awënë edæ oo pönī poncæcäimpa cæmīnii. Ee ædæmö cæte quëwëñömīni tömännäni waadete mīni cædönö ante edonque acædänimpa.

⁶ Ayæ, Quiëmë bacæ wæ, ante mīni wädö ante guiñente wädämaï iedäni. Wængonguinque ingante apæneedäni. Apænedinque, Wængongui, bitö pönö cæbi ate eyepæ inte quëwencæmönimpa, ante quiëmë mīni æncæ wädö incæ ante apænecæmīnimpa. Ayæ tömengä pönö cæcä adinque mīnitö, Bitö pönö cæbi waa æmönipa, ante Wængongui ingante wæætë waa ate pönente apæneedäni. ⁷ Ayæ, Wængongui piyänë cædinque pönö aacä beyæ mīnitö Itota Codito nempo quëwëninque piyänë cædinque mīmönë wädämaï inte nö pönëninque quëwencæmīnimpa. Edæ mönö, Æbämë cæte Wængongui pönö piyänë cæte aacää, ante mönö waocabo

ēñēnāmaī imō incæte tōmengā cōwē godōmenque aacā
ate wædāmaī inte quēwēmompa.

Quinō waa ī, ante mǎnīnonque ante pōnēē cōedāni, ante

⁸ Īñānāni ēñēedāni. Mīnitō æbānō ante pōnēē
conguēnēmīni imīnīpa, ante yewæmōninque botō ñōwo
æmæwo pōnī yewæmōmoī aedāni. Nāwangā nāni
apænedō ante pōnēē cōedāni. Æbānō waa cæquiī, æbānō
nō cæquiī, ante pōnēē cōedāni. Quiēnō nō ī, ante mǎnīnō
ante pōnēē cōedāni. Mōnō æbānō waadete pōnenguīī,
ante pōnēninque mōnō waa adoncoo ante adobaī pōnēē
cōedāni. Wadāni waa nāni cædinō ante pōnēē cōedāni.
Mǎnōmaī cædāni ate wadāni waa adānitawo. Īnīnque
tōmēnāni nāni waa adīnō ante mīnitō mǎnīnō ante pōnēē
cōedāni. Īnīnque, Quiēmē waa pōnī ī, ante adīnque
mǎnīnonque ante pōnēē cōedāni.

⁹ Botō odōmonte apænebo ēñēmīnitawo. Īnīnque botō
pōnō apænebo ēñēnīnque mīni ēñēnīnō baī tōmānō ante
edæ cæedāni. Botō pædæ pōnōmo æmīnitawo. Īn-
īnque botō pædæ pōnōmo mīni ænīnō incæ ee mæedāni.
Botō entawēnō ante, Æbānō entawēmoo, ante edonque
amīnitawo. Īnīnque botō entawēnō mīni adīnō baī
mīnitō adobaī entawēnīnque edæ waa cæedāni. Mǎnōmaī
cæmīni adīnque Wængonguī nē gānē pōnēnongā inte
mīnitō tōnō godongāmæ quēwēnīnque pōnō cæcā ate
mīnitō wæætē gānē pōnēmīni bacæmīnīmpa.

Pidipenteidi mīni pōnōnī waa æntabopa, Pabodo angampa

¹⁰ Botō wædō ante mīnitō doyedē pōnō cædīmīni
inte ñōwo wæætē tæcæ pōnente wædīnque wæætē
pōnō cæmīni ænīnque botō, Mōnō Awēnē beyænque
pōnō cæmīnīpa, ante adīnque nanguī waa tobopa.
Edæ botō wædō ante cōwē waadete pōnēmīni incæte
mīnitō da pōnoncæ cæyōmīnīte wææ cæte ī æīquedō da

pönonguimīnii. ¹¹ Incæte mänömaï apænedinque botö wīi ænguënemo inte apænetabopa. Edæ wædænque ëabo incæ nanguï ëabo incæ quiëmë ëabo incæ botö, Æbänö quëwenguïi, ante do ëñëmo inte edæ piyænë cæte wædämaï cöwë quëwëmopa. ¹² Ömæpobo wædimo inte botö, Ömaadäni æbänö quëwënänii, ante do ëñëmopa. Adobaï nanguï ëate quëwënimo inte botö, Nanguï ëadäni æbänö quëwënänii, ante do ëñëmopa. Edæ tömo cæmo incæ, gæwænte wæbo incæ, nanguï ëabo incæ, ömæpobo incæ mäninö tömänö ante wægaïmo inte botö mänömaï ingaïmo beyænque ëñente batabopa. Ìninqe æyömömë quëwëmo incæ quiëmë baï quëwëmo incæ piyænë cæte wædämaï quëwëmopa. ¹³ Edæ quiëmë beyæ wæbo incæ mönö Codito pönö cæcä ate botö wæætë edæ eyepæ entawëninque tömäa edæ cæbopa.

¹⁴ Incæte botö ömæpobo inte wæyömote mīnitö pönö cæmīni waa æntabopa. ¹⁵ Ayæ adobaï mönö Codito ingantedö ante watapæ möni apænedö ante tæcæ ëñëmīni ate botö Mäatedöniabæ ïninqe apænedinque wadæ goyömote wadäni Codito ingante näni godongämæ pönencabo pönönämaï ïñönänite mīnitö adomīnique da pönömīni æntabopa, ante mīnitö pidipenteidi do ëñëmīnipa. ¹⁶ Edæ, Tetadönica näni quëwëñömö quëwëninque Pabodo ömæpocä bacampa, ante tededäni ëñente wædinque mīnitö wīi adopoque wæætë wæætë da pönömīni æntabopa.

¹⁷ Botö dicæ botö æncæ wædö ante apænetabopa. Wæætë, Pidipenteidi wadäni ïnänite në godönäni ïnänipa, ante adinque Wængonguï wæætë mīnitö ïmīnite godömenque pönongä æncæmīnimpa, ante apænetabopa. ¹⁸ Ìninqe botö ïñömö idæwaa æntabopa. Botö ænguënënö æninqe godömenque nanguï ænte ëabopa. Edæ, Pabodo qui, ante mīni da pönönincoo Epapododito

wæætē botō imote pædæ pönongä äninque botō eyepæ pönī ēate quëwëmopa. Minitō, Wængonguī quī, ante oguī waquī bai pönō iya tante bai cædinque, Pabodo quī, ante da pönömini adinque, Waa pönī pönöminipa, ante Wængonguī incæ waa acampa. ¹⁹ Botō Wængonguī ñäö bai entawëninque tæi ëmongä inongä inte tömengä nänö ëadoncoo iñömö edæ bacoo pönī ongompa. İninque, Minitō ænguënëmini iminipa, ante adinque tömengä Itota Codito beyænque cædinque eyepæ pönī edæ da pönongä æncæminimpa.

²⁰ Mönö Wængonguī mönö Mæmpo iñongante, Bitō waëmö pönī inömi imipa, ante mönö cöwë watapæ apænecæimpa. Edæ ñöwopämo incæ miimämo incæ mönö cöwë mänömaï apænecæimpa. Mänömaï impa, äninque botō, Amëë, ämopa.

Mäinque ante yewämömopa, ante

²¹ Wængonguī quinäni Itota Codito nempo quëwënönäni iñönänite minitō, Waa quëwencæminimpa, ante botō beyæ ancæminimpa. Ayæ botō tönö godongämæ ongönäni incæ, Minitō æbänö quëwëminii, ante wädänipa. ²² Edæ Tæiyæ Awënë Tetædo oncönë quëwënäni tönö wädäni Odömä iñömö wayömö quëwënäni tönö Wængonguī quinäni incæ tömänäni adobaï minitō iminite, Waa quëwencæminimpa, änänipa.

²³ Mönö Awënë Itota Codito minitō iminite waadete pönö cæcæäimpa, ämopa. Mäinque ante yewämömopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

